

Til þeirra Kvennalistakvenna
sem hafa skráð sig á landsfund 1995.

Reykjavík, 30. október 1995.

Sælar og blesaðar Kvennalistakonur!

Nú er hálfur mánuður í landsfundinn og samkvæmt lögum Kvenna-listans sendum við út dagskrá fundarins í grófum dráttum, ásamt þeim tillögum sem borist hafa. Einnig eru hér bréf frá þingflokknum og gróf fjárhagsáætlun fyrir árið 1996. Þetta skulið þið nú lesa vendilega. (Ath. Til að spara pappír og burðargjöld er gjarnan ljósritað beggja vegna á blöðunum.)

Í tengslum við umræðuna um fundarsköp flytur Guðrún Agnarsdóttir stutta tölu sem hún er að vinna upp úr ýmsum fræðigreinum um fyrir-bærið „consensus“ sem aðferð til ákvarðanatöku.

Jóna Valgerður Kristjánsdóttir, Kristín Árnadóttir, Kristín Halldórs-dóttir og Stefánía Óskarsdóttir eru að semja drög að stjórnmálaályktun landsfundarins. Drögin verða kynnt á laugardeginum, áður en við skiptum okkur upp í starfshópa. Síðan verður einum hópi falið að vinna betur úr drögunum. Ályktunin verður að lokum rædd og afgreidd í sameiginlegum umræðum á sunnudeginum og verður það okkar síðasta verk áður en við höldum heim á leið.

Skráning er nú þegar orðin nokkuð góð þó varla sé hægt að tala um jafnvægi á milli anganna. Breiðið nú út fagnaðarerindið og hvetjið konur sem ekki hafa enn skráð sig til þess að gera það hið snarasta því enn er rúm fyrir margar konur til viðbótar. Við stefnum að því að hafa þetta skemmtilegan landsfund með mikilli pólitískri umræðu.

Oft hefur verið talað um að „táknrænar aðferðir“ geti gefist vel í baráttunni. Hugmyndir hafa komið upp um að við slettum örlítið úr klaufunum og fórum í fataleik. Hvernig litist ykkur á að mæta með jakkaföt í farteskinu og æðislega samkvæmiskjóla til að skarta á laugardagskvöldinu? Tjull, pallíettur, blúndur, knipplingar og allt sem nöfnum tjáir að nefna. Með því að hefja fundarstörfin í jakkafötum er hugmyndin að ögra þeim röddum sem segja að við séum gengnar inn í karlasamfélagið. Það væri gaman að heyra í ykkur en við gerum ráð fyrir að við látum reyna á þessar hugmyndir ef ekki heyrast hávær mótmæli.

Því miður láðist að reikna jöfnunargjaldið með þegar landsfundurinn var kynntur í síðasta fréttabréfi. Það verður því að leggja 1000 kr. ofan á þessar 6.800 sem auglýstar voru en jöfnunargjaldinu er ætlað að vega upp á móti þeim kostnaði sem samtökin hafa af ferðum til og frá landsfundi.

F.h. landsfundarnefndar

(Áslaug Thorlacius)

Áslaug Thorlacius.